

INUIT ATAQATIGIIT

Inatsisartuni



16.december 2018

Inatsisartut suleriaasianni § 37, imm. 1 naapertorlugu matumuuna Naalackersuisunut imaattumik apeqquteqaateqarpunga.

Naalackersuisunut apeqqut:

1. Royal Greenlandip kilisaataani:
 - a. Aquttut qassiuppat?
 - b. Naalakkat qassiuppat?
 - c. Maskinmesterit qassisuppat?
 - d. Taakkunanga kalaallit nunaanni inunngorsimasut qassiuppat?
2. Ukiut kingulliit qulit ingerlaneranni kalaallit qassit kilisaatini/umiarsuarni aquttussatut, naalagassatut, maskinmesterissatullu ilinniakkaminnik naammassippat?
 - a. Taakkunanga qassit Royal Greenlandimi atorfinitsinneqarpat?
 - b. Kalaallinik aquttussatut, naalagassatut maskinmesteritulluunniit qinnuteqaraluartunik itigartitaasoqartarpa? Taamaattoqarsimappat tamanna sumik peqquteqarpa?
3. Imarsiornermik ilinniarfimmik nunatsinni pilersitsimaneq Naalackersuisut isumaat naapertorlugu qanoq nunatsinnut iluaqutaatigisimava? Iluaqutaasimappat sukkut iluaqutaasimava?
4. Imarsiornermi ilinniarfimmi ilinniarsimasut RG-ip kilisaataani atorluarneqarpat?
 - a. Akissut aappiuppat sutigut atorluarneqarpat?
 - b. Akissut naamiuppat sumik tamanna peqquteqarpa?
5. Royal Greenlandip kilisaataani aquttut, naalakkat, maskinmesterillu amerlanerpaartaasa kalaaliunissaat anguniarlugu Naalackersuit qanoq pilersaaruteqarpat? Qanoq iliuuseqarniarpat?
6. Imarsiornermi ilinniakkat salliunneqarnerulernissaat pillugu Naalackersuisut qanoq iliuuseqarniarpat? Kalaallit aquttut, naalakkat maskinmesterillu ilinniarsimasut amerlanerulernissaat pillugu Naalackersuisut qanoq pilersaaruteqarpat?
7. Ingerlatseqatigiiffimmi Inuiaqatigiit pigisaanni sulisoqarnikkut iliussissatut suut Naalackersuisunit piumasaqataappat? aamma ingerlatseqatigiiffiup RG-ip piumasaqaatai kalaalallinit naammassineqarsinnaanissaat anguniarlugu Naalackersuisut qanoq pilersaaruteqarpat?

8. Kalaallit aqumiut amerlanerulernissaat anguniarlugu tigussaasumik Naalackersuisut pilersaarusiorniapat? – susassaqarfimmut aningaasaliinerunissaq pilersaarutaava?

(Inatsisartunut ilaasortaq Peter Olsen, Inuit Ataqatigiit)

Tunngavilersuut:

Sermitsiaq AG-ip nittartagaani ulloq 13.december ilaatigut ima allasimasoqarpoq:

”Kalaallit Nunaanni inuit ikippallaarpugut. Nunasiortorneq allamiullu amerlanerit inuiaqatigiinnut tapertaasinnaasut pisariaqartippavut.

Taassuma tikkuarpaa, Royal Greenlandimut kilisaatini aqumiunik Savalimmiormiunik atuisinnaaneq pingaartuusoq, kalaallinik ilinniarsimasunik amigaateqarmat.”

Royal Greenlandip pisortaaneraniit oqariartuut taama nipeqarpoq.

Ukioq 1979-mi namminersornerulerpugut aammalu 2009-mi namminersulerluta siunertaralutigu nunatsinni immitsinnut aqunnerulerumalluta, akisussaaffeqarnerulerumallutalu. Nunatsinni ukiuni siuliini, sutigut tamatigut ineriartornerup iluani isiginnaartuuginnarsimanitta – akisussaaffiijagaasimanittalu kingunerisimasai suujunnaarsikkumallutigit. Akisussaaffik nammineq tigorussukkatsigu, immitsinnullu aqunnerulerumalluta.

Ajoraluartumik ullumikkut uunga kiisa killippugut siunertarput anguniagarpullu suliluunniit iluamik qanillattorpiarsimanatigu. Tamanna uggornarpoq ajuusaarnarlunilu.

Tamatuma takutiinnarpaa, suli sutigut tamatigut sukataarnerullutalu ilungersornerusariaqartugut anguniagarput siunertarpullu qanillattorsinnaajumallutigu.

Taamaattumik tamanna pillugu Naalackersuisunut apeqquteqaatiga taama tunngavilersorlugu ingerlateqqippara.

Qinnutigissavara apeqquteqaatima ullut suliffiusut qulit iluanni akineqarumaartut.